



助字辨略卷三目錄

上聲

孔

總

只

彼

此

爾

底

以

呂同

抵通

尔亦同

統

動

是

俛

俾

耳

止

已

里附



似

使

唯

矣

匪

與

所

甫

愈

殆

乃

忍

準

近

宛

曹

但

覩

展

轉

比

始

幾

豈

猥

許

舉

取

每

迨

矧

盡

允

反

本

誕

斷

鮮

審

小

俞通

廼同

但通

儘

尠同

少

好

果

叵

夥

者

雅

且

罔

黨

併

鼎

竝

等

有

偶

苟

陡

審

恁

了

可

坐

頗

舍

也

假

往

儻

妄

請

頃

整

肯

否

後

某

寢

甚

敢

並同

浸寢寢寢同

漸

奄

潛

助字辨略卷三

孔爾雅云甚也詩國風父母孔邇書禹貢九江孔

殷

統後漢書胡廣傳夫紆於物則非已直於志則犯

俗辭其艱則乖義徇其節則失身統之方軌易因

險塗難御故昔人明慎於所受之分遲遲於歧路

之間也注云統者總論上事也愚按統之猶言總

之

總廣韵云合也皆也愚按統也都凡之辭也史記

確山劉淇



五帝紀總之不離古文者近是杜元凱左傳序傳之義例總歸諸凡

動 漢書食貨志又動欲慕古不度時宜世說簡文為相事動經年然後得過李義山詩殷憂動即來凡云動者即兼動輒之義乃省文也動舉動也輒即也言每舉動即如此也

只 說文云語已辭左傳襄公二十七年叔向謂趙孟曰諸侯歸晉之德只非歸其尸盟也杜注云只辭也又詩國風樂只君子鄭箋云又能以禮義樂其君子正義云南山有臺箋云只之言是則此只

亦為是此箋云樂其君子猶言樂是君子矣朱傳云只語助辭愚按德只樂只竝助辭也如國風母也天只不諒人只宋玉大招純用只字乃語已辭如今思之屬又通作軼莊子大宗師而奚來為軼崔譔云軼辭也又莊子徐無鬼請只風與日相與守河而河以為未始其攖也杜子美詩寒花只暫香又云只想竹林眠此只字義同止猶云但也 是 非之反也論語是知也孟子是尚友也又此也 孟子非是之謂也漢書刑法志有君若是其賢也若是猶如此也又書蔡仲之命惟德是輔論語今

之孝者是謂能養左傳昭公七年公曰何謂六物對曰歲時日月星辰是謂也此是字語助不為義也爾雅云時是也又云實是也詩伊可懷也鄭箋云伊當作繫猶是也然則時實伊是皆音相近故通得為語助也又史記鄭世家子臆曰齊強而厲公居櫟即不從是率諸侯伐我內厲公我不如往此是字謂齊指物之辭也又易繫辭是興神物以前民用此是字發語辭猶云爰也又顏氏家訓呂尚之兒如不為上趙壹之子儻不作一便是下筆即妨是書皆觸也是書之是猶凡也言凡是書札皆觸忌諱也今謂處處曰是處猶云到處也又左傳桓公六年於是乎民和而神降之福僖公二十五年晉於是乎作爰田晉於是乎作州兵昭公元年於是有煩手淫聲恹堙心耳漢書高帝紀於是陳平夜出女子東門二千餘人萬石君傳奮長子建次甲次乙次慶皆以馴行孝謹官至二千石於是景帝曰石君及四子皆二千石人臣尊寵廼舉集其門凡號萬石君於是者繼事之辭猶云爰乃也又隱公十一年君子謂鄭莊公於是乎有禮襄公三年君子謂祈奚於是能舉善矣按傳謂鄭莊

公定許而不有此一處置為中乎禮故云於是乎有禮祈奚三舉皆不私故云於是能舉善皆因前事而為論定之辭或云君子謂鄭莊公於是乎有禮者言有禮僅見於此而他處不然乃寓刺之文然則祈奚可容刺耶知不然矣又左傳僖公十五年震夷伯之廟罪之也於是展氏有隱隱焉史記項羽紀廣陵人召平於是為陳王循廣陵未下韓退之董太傅狀又拜國子祭酒宣慰恒州於是未滔自范陽以迴紇之師助亂人大恐此於是猶云其時尚書諸時字竝訓作字則是亦可通作是也

又孟子則是方四十里為阱於國中駱賓王上司刑太常伯啟側聞魯澤祥麟希委質於宣父吳坂逸驥實長鳴於孫陽是則所貴在乎見知所屈伸乎知己則是是則其義竝同承上文為斷辭也又漢書高帝紀是日車駕西都長安是日猶即日也又左傳僖公十五年三施而不報是以來也孟子是以若彼濯濯也詩關雎序是以一國之事繫一人之本正義云是以者承上生下之辭言詩人作詩用心如此愚按是以猶云所以

彼廣韵云對此之稱愚按俗謂此曰者箇曰者樣

謂彼曰那箇曰那樣如詩國風疇彼小星彼茁者  
葭此彼字猶云那箇也如孟子管仲得君如彼其  
專也此彼字猶云那樣也義微有別

俛 列子俛俛成者俏成者也初非成也俛幾也將  
也俏似也言將成有似於成本非成也俛與危音  
相近故得為幾將之辭

此 是也茲也彼之對也禮記禮運如此乎禮之急  
也孟子其自任以天下之重也如此又云如此然  
後可以為民父母漢書刑法志宣帝自在閭閻而  
知其若此又云夫以孝文之仁平勃之知猶有過

刑謬論如此甚也又指物之辭左傳莊公二十二  
年陳衰此其昌乎此謂敬仲也又大學此以沒世  
不忘也此以猶云是以所以又大學有德此有人  
有人此有土有土此有財有財此有用後漢書黃  
瓊傳自生民以來善政少而亂俗多必待堯舜之  
君此為志士終無時矣諸此字猶云斯也乃也又  
吳志宗室傳松笑曰屬亦自忿行事有此豈有望  
邪有此猶言如此

俾 廣韻云使也愚按詩國風俾也可忘書大禹謨  
勸之以九歌俾勿壞竝是意欲其如此其義虛而

未定非使令之謂也使令之使其義實故使民奉使之使不得云俾也又省作卑荀子引詩俾民不迷作卑民不迷

爾 與尔同此也是也襄陽耆舊傳自爾以來自爾猶云自此也世說謝仁祖年八歲謝豫章將送客爾時已神悟自叅上流又云許掾嘗詣簡文爾夜風恬月朗爾時是時也爾夜是夜也又吳志大帝傳注此鼠子自知不能保爾許地也爾此也許助辭爾許少辭也又世說名教中自有樂地何為乃爾也又云正始之音正當爾耳又云君不得為爾

此爾字猶云如此也漢書田叔傳相曰王自使人償之不爾是王為惡而相為善也吳志周魴傳不爾以往無以成也不爾猶云不如此也又廣韵云辭之必然也愚按辭之必然者語已之辭義無可疑如也已之類也孟子是何足與言仁義也云爾趙注云云爾者語絕之辭也又論語則可謂云爾已矣此云爾猶言如此與上義別云得為如者詩國風云何吁矣之云義為如也又論語女得人焉爾乎朱子語類云焉爾乎語助辭聖人之言寬緩而不急迫又公羊傳隱公二年前此則曷為始乎

此託始焉爾何休云焉爾猶於是也愚按此焉爾亦語已辭若以為於是則紀子伯莒子盟於密傳云紀子伯者何無聞焉爾此焉爾寧可作於是耶又應邵風俗通義序周秦常以歲八月遣輜軒之使求異代方言還奏藉之藏於秘室及嬴氏之亡遺脫漏棄無見之者蜀人嚴君平有千餘言林閭翁孺才有梗概之法揚雄好之天下孝廉衛卒交會周章質問以次注續二十七年爾乃治正凡九千字魏志楊阜傳書曰九族既睦協和萬邦事思厥宜以從中道精心計謀省息費用吳蜀以定爾乃上安下樂九親熙熙此爾字猶云斯也然後也爾既訓此故得轉為斯也又張平子西京賦爾乃廣衍沃野厥土上上又云爾乃廓開九市通關帶闔凡賦之更端發語多云爾乃或云爾其與上爾乃義別又禮記檀弓爾母從從爾爾母扈扈爾又云居處言語飲食衎爾漢書淮陽王傳博得謁見承問進問五帝三王究竟要道卓爾非世俗之所知諸爾字猶云然也又吳志劉繇傳一爾分離款意不昭世說於時江左營建始爾此爾字助語辭不為義也又詩小雅爾公爾侯猶云乃公乃侯亦

助辭也又溫飛卿詩爾來何處不恬然爾來猶近來也

耳 顧氏日知錄云而已為耳愚按語已辭也如漢書賈誼傳逐利否耳以為是適然耳又云主耳忘身國爾忘家公爾忘私竝與而已相近主耳忘身者言所念唯主而已不及身也又為語餘聲與耶相近魏志崔琰傳注後與南郡習授同載見曹公出授曰父子如此何其快耳此耳字有詠歎之意與而已義別吳志劉惇傳注吳主共論鱸魚何者最美象曰鮠魚為上吳主曰論近道耳此出海中安可得耶象曰可得耳論近道耳之耳是而已之辭可得耳之耳乃語之餘聲言易得也又孟子盡心焉耳矣趙注云焉耳者懇至之辭孫疏云耳矣者言至極也愚按凡云耳矣者盡而無餘之辭如莊子人間世雖然止是耳矣亦同此義故趙孫訓為懇至至極也

底 列子林顏底春被裘注云底及也又韓退之詩潮州底處所又云有底忙時不肯來李義山詩柳映江潭底有情此底字何也那也又元微之詩那知下藥還沽底此底字猶云此也又通作抵溫飛

卿詩去帆不安幅作抵使西風言帆不安幅將用何物以使西風也

止 詩國風既曰歸止曷又懷止止與只同語已辭也又詩關雎序箋云今謂此序止是關雎之序庾子山華林園馬射賦止立行宮裁舒帳殿此止字僅辭也

以 古作呂廣韵云用也論語不以禮節之又云道之以政齊之以刑莊子逍遙游奚以之九萬里而南為漢書食貨志呂臨萬貨呂調盈虛呂收竒羨又左傳僖公二十六年公以楚師伐齊取穀凡師

能左右之曰呂杜注云左右謂進退在已愚按能左右之亦用辭也又漢書高帝紀鄉者夫人兒子皆以君此以字猶因也以得為因者因是爰辭爰用相通以既為用故可轉為因也又列子宋人執而問其以注云以故也愚按以得為故者亦因之轉也如詩國風何其處也必有以也史記惠景侯者表太史公讀列侯至便侯曰有以也夫有以猶云有因有故也又左傳昭公十三年我之不共魯故之以杜注云不共晉貢以魯故也愚按魯故之以猶云因魯之故倒文也又易繫辭夫易廣矣大

矣以言乎遠則不禦以言乎邇則靜而正以言乎  
天地之間則備矣此以字猶云於以乃爰辭也又  
詩國風其釣維何維絲伊緡鄭箋云釣者以此有  
求於彼何以為之乎以絲之為綸則是善釣也以  
言王姬與齊侯之子以善道相求周頌匪且有且  
匪今斯今正義云謂嘉慶禎祥之事非謂其有而  
已有之以言報應之疾也儀禮士相見禮吾子有  
辱鄭注云有又也正義云鄭轉有為又者以言某  
子以命命某往就彼見吾子又自辱來於義為便  
故從又不從有也愚按此以字猶云所以所以者

求其故而言之亦因之轉也又論語禮以行之遜  
以出之信以成之韓退之賀冊尊號表歡欣踴躍  
以歌以舞此以字語助不為義也又易坤卦六二  
象曰六二之動直以方也春秋隱公七年戎伐凡  
伯於楚丘以歸禮記樂記其哀心感者其聲噍以  
殺其樂心感者其聲嘽以緩孟子自有生民以來  
史記天官書幽厲以往尚矣高帝紀南浮江漢以  
下此以字猶而也又論語無以為也無以猶云不  
可如此為字語助也又易復卦上六用行師終有  
大敗以其國君凶朱子本義云以猶及也愚按以

與古通與得為及故以亦得為及也如論語季康子問使民敬忠以勸猶云敬忠與勸也魏書李順傳此年行師當克以不猶云當克與否也韓文與詩凡今之人急名以官蔣之翹云韓文與也也又孟子三月無君則弔不以急乎以通已已急言太急也又孟子無以則王乎朱注云以已通用無已言必欲言之而不止也愚按此與下篇無已則有一焉義同緣上文既云臣未之聞也是謀非吾所能及也更為之轉作商量故云無以則王乎無已則有一焉也如管子臣聞之消息盈虛與百姓姓繼信然後能以國寧勿已者朋其可乎亦是轉作商量之語非必欲言之不止也又史記趙世家以服為臣王右軍帖此心以馳於彼此以字亦通一已猶云既已也又禮記檀弓天則不雨而望之愚婦人於以求之母乃已疏乎陳氏集說云於以求之猶言於此求之

已 漢書禮樂志自夏以往其流不可聞也師古云已語終辭馮唐傳唐對曰齊尚不如廉頗李牧之為將也上曰何已師古云已猶耳愚按何已問辭也凡問之餘聲揚以長則為何耶何與抑而短則

為何已何耳又左傳桓公六年在我而已大國何為而已言無餘事也又漢書叙傳啟義依霍庶幾云已如淳云若此人無益於治可為庶幾而已也愚按云已猶而已史記太史公自序疆弱之原云以世徐廣云云以世一作云已也引庶幾云已為證索隱云以當作已世當作也竝誤云已也皆語助辭愚按注以為漢興以來諸侯廢立分削譜紀不明聊復紀其疆弱之原而已故云疆弱之原云已也此云已與叙傳義同索隱公竝誤者謂已誤以也誤世不知已以通用本不為誤特也字隸文

與世相近而訛耳然此句上下當有闕文又書梓材已若此史記夏紀召湯而囚之夏臺已而釋之周紀武王已乃出復軍項羽紀韓王成無軍功項王不使之國與俱至彭城廢以為侯已又殺之倉公傳此病得之當浴流水而寒甚已則熱諸已字猶云既也又廣韵云止也甚也詩國風無已太康毛傳云已甚也正義云已訓止也物甚則止故已為甚也顧氏日知錄云已即太也愚按已太過也已太重言也又禮記檀弓吾得正而斃焉斯已矣賈疏云已猶了也愚按此已字乃是止辭如史記

趙世家李兌曰諾子勉之矣吾見子已今年耳已今年者言止今年相見也又史記荆軻傳終已不顧終已竟辭猶言卒也又史記倉公傳即嘗已為人治胗病決死生有驗嘗曾也已嘗也嘗已重言也凡曾為此事曰已故已得為嘗也又世說吾時月不見黃叔度則鄙吝之心已復生矣又云嵇阮山劉在竹林酣飲王戎後往步兵曰俗物已復來敗人意此已字猶又也又書大誥已予惟小子孔傳云已發端歎辭正義云復歎而言已乎我惟小子也康誥已汝惟小子乃服孔傳云已乎汝惟小子乃當服行德政愚按已音與噫嘻相近故得為發端歎辭也又漢書文帝紀年八十已上賜米人月一石肉二十觔宇文道庾子山集序今之所撰止入魏已來此已字與以通又爾雅云已此也郭注云方俗異語邢疏云已此音相近故得為此也又考工記里為式然後可以傳衆力鄭注云里讀為已聲之誤也

似 廣韻云類也象也論語屏氣似不息者吳志太史慈傳竝觀察子魚所以牧禦方規何似似如也何似何如也又世說龐士元曰論王霸之餘策覽

倚仗之要害吾似有一日之長王大將軍云阿平  
故當最劣庾曰似未肯劣此似字疑辭也又元微  
之詩子蒙將此曲吟似獨眠人吟似猶云吟向  
比 孟子願比死者一洗之又云且比化者無使土  
親膚朱注云比猶為也又魏志東夷倭人傳對應  
聲曰噫比如然諾比如譬如也

使 論語使驕且吝後漢書仲長統傳使居有良田  
廣宅使假設之辭也又史記孔子世家譬使仁者  
而必信安有伯夷叔齊使智者而必行安有王子  
比干譬使重言也

始 廣韻云初也左傳隱公五年於是初獻六羽始  
用六佾也隱公八年虢公忌父始作卿士於周又  
論語始吾於人也聽其言而信其行史記高帝紀  
沛公曰始懷王遣我固以能寬容曹相國世家參  
始微時與蕭何善此始字追原之辭也與上義別  
又禮記月令桃始華蟬始鳴班固典引乃始虔鞏  
勞謙兢兢業業貶成抑定不敢論制作洛陽伽藍  
記趙逸云郭璞嘗為吾筮云壽年五百歲今始餘  
半此始字猶云方也纔也又論語賜也始可與言  
詩已矣溫飛卿詩霸才無主始憐君此始字猶云

乃也然後也又莊子齊物論有以為未始有物者未始猶言未嘗

唯 論語曾子曰唯朱注云唯者應之速而無疑也楚襄王問宋玉曰先生其有遺行乎何士民衆庶不譽之甚也宋玉對曰唯然有之然亦應聲也既唯又然重應之也按禮記內則男唯女俞則唯乃應之急而俞乃應之徐然唯字有兩義如曾子曰唯是荅者心契其言而更無所疑惑之辭如宋玉曰唯則是猶未以為然姑且荅之然後徐理其說也史記范雎傳秦王曰先生何以幸教寡人范雎曰唯唯若是者三此唯字竝是姑且作荅與曾子之唯不同也又鬻子對文王曰唯疑注云既唯而又疑如太史公唯唯否否之意愚按此類竝是姑應之辭非實然之也

幾 左傳僖公二十三年夫有大功而無貴仕其人能靖者與有幾杜注以其人能靖者句絕陸氏釋文以與字句絕愚按陸說為長言有大功而不酬之以貴仕其人能安靖耶有幾人也有幾正謂其無人也荀子議兵篇是其出賃市傭而戰之幾矣楊注云此與賃市中傭作之人而使之戰相去幾

何也愚按幾矣者言相去無多也又史記循吏傳如此幾何頃乎此云幾何猶今問多少不定之辭也左傳昭公十六年子太叔子羽謂子產曰韓子亦無幾求杜注云言所求少又詩國風未幾見兮突而弁兮未幾無多時也又吳商浩詩零落幾多紅藕花幾多猶今云許多言不少也又南唐李後主詞三十餘年家國數千里地山河幾曾慣干戈幾曾何曾也又荀子榮辱篇是其為相縣也幾值夫芻豢之縣糟糠爾哉楊注云幾讀為豈史記黔布傳人相我當刑而王幾是乎徐廣云幾一作豈愚按幾是乎者疑辭也又左傳昭公十六年幾為之笑而不陵我顧氏補正云言幾見有為之笑而不陵我者乎與十年傳幾千人而國不亡二十四年傳幾如是而不及郢義同愚按此幾字亦當訓豈猶言豈有如此而不如此者反言之也

矣說文云語已辭論語吾必謂之學矣是如津矣此矣字辭氣定柳子厚所謂決辭者也又論語忠矣清矣此矣字辭氣未定有僅可之意未深許之也又論語惡不仁者其為仁矣不使不仁者加乎其身其為仁矣猶云其為仁也是頓挫之辭言惡

不仁者其於為仁也不使不仁之事加乎其身不使不仁之或如是乃所以為仁也又論語周之德其可謂至德也已矣凡語已辭詠歎深至則辭氣闡緩而長故重疊言之也又孟子天下之言性也則故而已矣而已矣者盡而無餘之辭也又孟子如以辭而已矣雲漢之詩曰周餘黎民靡有孑遺信斯言也是周無遺民也此而已矣與上義別乃反起下文辭之未畢者也又論語甚矣吾衰也史記楚元王世家甚矣安危在出令存亡在所任誠哉是言也甚矣者深歎之也

豈 廣韵云安也焉也曾也愚按又寧也孟子豈能獨樂哉此豈字安也焉也寧也金重於羽者豈謂一鈎金與一輿羽之謂哉此豈字曾也寧也詩國風豈不夙夜謂行多露此豈字寧也非也又何也論語且而與其從辟人之士也豈若從辟世之士哉漢書賈誼傳豈如今定經制令君君臣臣上下有差父子六親各得其宜豈若豈如猶云何若何如漢書王貢兩龔傳谷口鄭子真不詘其志耕於巖石之下名震於京師豈其卿豈其卿者猶云何必卿也又後漢書爰延傳夫以光武之聖

德嚴光之高賢君臣合道尚降此變豈况陛下今所親幸以賤為貴以卑為尊哉吳志諸葛恪傳自孔氏門徒大數三千其見異者七十二人至於子張子貢子路等七十之徒亞聖之德然猶各有所短師辟由嘯賜不受命豈况下此而無所闕豈况何况也又論語其然豈其然乎史記項羽紀羽豈其苗裔耶漢書卜式傳家豈有冤欲言事乎此豈字辭之未定與寧義通又史記封禪書此豈所謂無其德而用事者邪吳王濞傳毋為權首反受其咎豈盜錯邪漢書西南夷兩粵朝鮮傳追觀太宗填撫尉佗豈古所謂招携以禮懷遠以德者哉此豈字亦辭之未定猶云殆也又後漢書隗囂傳若囂命會符運敵非天力雖坐論西伯豈多嗤乎注云多厚也言未可厚以為非笑也愚按此豈字猶云豈可省文也又吳語春秋貢獻不解於王府大王豈辱裁之此豈字與其通音相近也

匪 廣韵云非也易屯卦六二匪寇婚媾又不也詩國風夙夜匪懈後漢書順帝紀間者日食毀缺陽光晦暗朕祗懼潜思匪遑啟處又左傳襄公八年引詩如匪行邁謀是用不得於道杜注云匪彼也

顧氏補正云詩箋云不行而坐圖遠近故不得於道路也此解曰匪彼也行邁謀謀於路人也不得於道衆無適從按詩上文云謀夫孔多是用不集發言盈庭誰敢執其咎則此解為長古人有以匪字作彼字用者二十七年引詩彼交匪敖作匪交匪敖愚按謀夫雖多而無老成人譬如行邁而不與行邁者謀終不得其道耳此匪字當仍訓非然補正說亦通兩存之以備考又宇文道庾子山集序年十五侍梁東宮講讀雖桓麟十四之歲答宿客之詩魯連十二之年杜離堅之辨匪或斯尚同日語哉此匪字猶豈也或助語尚庶幾也言桓麟魯連未可與此同日而語也

猥 漢書律歷志壽王猥曰安得五家歷王尊傳猥歷奏大臣師古竝云猥曲也劉歆傳猥以不誦絕之師古云猥苟也苟不誦習之而欲絕去此學曹子建上責躬詩表不圖聖詔猥垂齒召李善云猥猶曲也殷仲文詩猥首阿衡朝五臣云言已以凡猥妄首朝端也許慎淮南子注猥猶凡也正字通云猥鄙也凡自稱猥者卑辭也愚按猥猶云謬也與 論語夫子之言性與天道不可得而聞也正義

云與及也史記周紀昔自夏后之衰也有二神龍止於夏帝庭而言曰余褒之二君夏帝卜殺之與去之與止之莫吉漢書刑法志凡有爵者與七十者與未齒者皆不為奴諸與字竝及也若也又漢書高帝紀今某之所就孰與仲多師古云與亦如也匈奴傳單于自度戰不能與漢兵師古云與猶如也東方朔傳上復問朔方今公孫丞相兒大夫董仲舒夏侯始昌司馬相如吾丘壽王主父偃朱買臣嚴助汲黯膠倉終軍嚴安徐樂司馬遷之倫皆辨知閎達溢於文辭先生自視何與比哉師古云何與猶言何如也張平子西京賦此何與於殷人屢遷前八而後五李善云廣雅云與如也言欲遷都洛陽何如殷之屢遷乎又論語禮與其奢也寧儉左傳閔公元年為吳太伯不亦可乎猶有令名與其及也與其反說之辭傳先云猶有令名後云與其及也者倒文也又孟子與我處畎畝之中由是以樂堯舜之道吾豈若使是君為堯舜之君哉史記魯仲連傳吾與富貴而詘於人寧貧賤而輕世肆志焉此與字即與其省文也漢書藝文志漢興魯申公為詩訓詁而齊轅固燕韓生皆為之

傳或取春秋采雜說咸非其本義與不得已魯最  
為近之師古云與不得已者言皆不得已三家皆  
不得其真而魯最近之愚按此云三家皆非本義  
與其皆不得毋寧魯也又漢書賈誼傳陛下雖賢  
誰與領此此與字猶共也又杜元凱左傳序又別  
集諸例及地名譜第歷數相與為部凡四十部十  
五卷相與者比合之辭也

許 古樂府奈何許石闕生口中銜碑不得語世說  
直以真率少許便足對人多多許許者語之餘聲  
不為義也如李太白詩奈何成離居相去復幾許

杜子美詩我生本飄蓬今復在何許似乎幾許為  
幾何何許為何所然相去復幾便是幾何今復在  
何便是何所幾何何所之義不因許字而見特借  
許字為助句耳如問何許人則何許又為何等不  
為何所矣他若爾許之為此如許之為如此許字  
在此竝是助辭不為義也或問爾許之許為助句  
是也如許之許亦作助句寧如字可訓為如此邪  
曰如此猶云箇樣今人語緩則云箇樣語急則竟  
云箇矣然則如許之如亦語之急者也

所 處所也借為語助然凡云所皆有所在雖不為

義要自與而以之屬別如論語視其所以觀其所由察其所安所以所由所安皆有方向故云所也大學其所厚者薄而其所薄者厚所厚所薄皆據其人而言也中庸舟車所至人力所通天之所覆地之所載此為所至所通所覆載之處而言也又中庸所求乎子以事父未能也所求乎臣以事君未能也此以求臣求子之道事君父有一定之則故云所也又詩小雅所謂伊人於焉嘉客此指意中欲留之人故云所謂大學所謂修身在正其心者此所謂引前文也詳四卷謂字條下凡此所字皆有所指目非空為助句者也又論語予所否者天厭之天厭之注疏云所誓辭也左傳僖公二十四年所不與舅氏同心者有如白水文公十三年所不歸爾帑者有如河宣公十七年所不此報無能涉河襄公二十三年所不請於君焚丹書者有如日二十五年嬰所不唯忠於君利社稷者是與有如上帝昭公三十一年所能見夫人者有如河定公三年余所有濟漢而南者有如大川六年所不以為中軍司馬者有如先君哀公十四年所不殺子者有如陳宗杜注竝云所誓辭也愚按所字

未必定是誓辭疑當作誓辭之例以所字為發句而繼之以有如云何也又孟子所以不願人之膏粱之味也所以不願人之文繡也所以猶云故也又漢書於定國傳日夜思惟所以未能盡明思惟所以猶云思惟其故與上所以義別又孟子其所以放其良心者亦猶斧斤之於木也又云拱把之桐梓人苟欲生之皆知所以養之者漢書張安世傳賀內傷太子無辜而曾孫孤幼所以視養撫循恩甚密焉所以放其良心者原其放之之心皆知所以養之者原其養之之術所以視養拊循者原其視養之密非恚可舉其事故統云所以也又漢書賈誼傳此所以為主上豫遠不敬也所以體貌大臣而厲其節也此言廉遠地則高堂故刑戮不加於大臣乃為主上豫遠不敬而厲大臣忠節之道也又云夫嘗已在貴寵之位天子改容而禮貌之矣吏民嘗俯伏以敬畏之矣今而有過帝令廢之可也退之可也賜之死可也滅之可也若夫束縛之係縶之輸之司寇編之徒官司寇小吏詈罵而榜笞之殆非所以令衆庶見也夫卑賤者習知尊貴者之一旦吾亦乃可以加此矣非所以習天

下也此言衆庶可以辱大臣其流將滯以及上非習教衆庶豫遠不敬之道也皆探本言之故云所以又詛策云諸侯之地其削頗入漢者為徙其侯國又封其子孫也所以數償之此言諸侯之地已削而入於漢其後又以之封它侯國不可奪見在者還舊封之諸侯別以它地如其祖所封之數而償之也此所以猶云其以又禮記檀弓其高可隱也鄭注云隱據也封可手據謂高四尺所疏云言墳之高可四尺之所以人長八尺低而據之半為四尺且約上墳崇四尺故云四尺所所是不定之辭愚按四尺所猶云四尺許未定是四尺強弱故云所也如漢書疏廣傳數問其家金餘尚有幾所師古云幾所猶云幾許又如史記留侯世家父去里所復還吳志周魴傳才留三千所兵守武昌耳世說自後賓客絕百所日諸所字並許辭也又漢書佞幸傳上有酒所師古云言酒在體中師古訓所為處所故云酒在體中恐非此言被酒而已未至沉醉故云有酒所此所字亦是助語不為義也舉 孟子舉欣欣然有喜色注云舉皆也漢書曹參傳參代何為相國舉事無所變更師古云舉皆也

言凡事無所變改愚按此舉字徑訓凡於義為協又顏氏家訓舉家無食汝何處來舉家猶全家也甫廣韵云始也愚按始也方也纔也漢書元許后傳今吏甫受詔讀記師古云甫始也宋書謝靈運傳至於建安曹氏基命三祖陳王咸畜盛藻甫乃以情緯物以文被質甫乃方乃也蜀志秦宓傳甫欲鑿石索玉剖蚌求珠今乃隋和炳然有如皎日甫欲者方欲如何而猶未如何也

取 孟子楊子取為我朱注云取者僅足之辭言僅足於為我而已不及為人也漢書佞幸傳二人之寵取過庸不篤師古云纔過於常人耳不能大厚也愚按纔亦僅也又岑嘉州詩別君能幾日看取鬢成絲白香山詩聽取新翻楊柳枝此取字語助也

愈 益也又與俞通荀子榮辱篇清之而俞濁者口也秦之而俞瘠者文也楊注云俞讀為愈又史記秦本紀遂復三人官秩如故愈亦厚之愈益重言也又後漢書班固傳彪固譏遷以為是非頗謬於聖人然其議論常排死節否正直而不叙殺身成仁之為美則輕仁義賤守節愈矣注云愈猶甚也

愚按愈矣者省文言愈甚也又左太冲三都賦孰  
愈尋靡薜於中逵造沐猴於棘刺孰愈猶云何異  
言相去無幾也

每爾雅云每有雖也郭注云詩曰每有良朋辭之  
雖也邢疏云小雅常棣云每有良朋况也永歎毛  
傳云况茲永長也箋云每有雖也良善也當急難  
之時雖有善同門來茲對之長歎而已郭云辭之  
雖也者言為語辭之雖無他義也又孟子故為政  
者每人而悅之日亦不足矣每人猶云人人漢書  
元許后傳妾伏自念入椒房以來遺賜外家未嘗

踰故事每輒決上可覆問也師古云每事皆奏決  
於天子乃敢行也愚按每事猶凡事但云每者省  
文也又吳志陸抗傳諸將咸欲攻闡抗每不許魏  
文帝與吳質書每一念至何時可忘此每字猶常  
也其事非一故云每也魏至夏侯彖傳注豐為中  
書二歲帝比每獨召與語不知所說比頻也比每  
猶云常常重言也

殆詩國風殆及公子同歸毛傳云殆始也孔疏云  
釋詁云殆始也說者皆以為生之始然則殆始義  
同故為始也愚按殆助辭猶云將也乃也如易繫

辭顏氏之子其殆庶幾乎孟子殆於不可殆不可復史記張儀傳蘇秦已而告其人曰張儀天下賢士吾殆弗如也扁鵲傳乃悉取其禁方書盡與扁鵲忽然不見殆非人也後漢書楊賜傳故春秋兩蛇鬪於南門昭公殆以女敗康王一朝晏起闕睢見幾而作諸殆字並是助辭不為義也又禮記檀弓不殆於用人乎哉正義云殆近也愚按殆幾也幾有將及之義故云近也魏志王朗傳注登與縣長王雋帥吏兵七十二人直往赴救與賊交戰吏兵散走雋殆見害登手格一賊以全雋命此殆字垂及之辭也又水經注蔡昭冢有石闕闕前有二碑碑字淪碎不可復識羊虎傾低殆存而已此殆字猶云僅也又荀子強國篇若是則雖為之築明堂於塞外而朝諸侯使殆可矣楊注云殆庶幾也愚按僅將垂庶皆是幾辭展轉相訓其義有別迨爾雅云及也詩國風迨天之未陰雨

乃古作廼鄭樵云引辭也不絕之義也詩大雅廼召司空廼召司徒史記主父偃傳以為諸侯莫足游者乃西入關見衛將軍乃者繼事之辭猶云爰也又書仲虺之誥乃葛伯仇餉此乃字猶云乃者

如史記歷書乃者有司言星度之未定也曹相國世家乃者我使諫君也並是發語之辭又孟子乃若其情則可以為善矣蜀志秦宓傳乃自先漢以來其爵位者或不如餘州耳至於著作為世師式不負於餘州耳此乃字亦是發語辭猶云粵也乃若猶粵若也又書大禹謨乃聖乃神乃文乃武盤庚具乃貝玉此乃字語助辭不為義也禮記雜記祝稱卜葬虞子孫曰哀夫曰乃鄭注云夫曰乃某卜葬其妻某氏孔疏云乃者言之助也妻卑故假助句以明夫之尊也又書盤庚萬民乃不生暨暨予一人猷同心此乃字亦是語助然與上義別凡非意所及用相違戾則語助云乃也又書盤庚乃祖乃父舊訓乃為汝按此亦當是語助如後漢書袁紹傳加自乃祖先臣以來世作輔弼任昉為范尚書讓吏部封侯表乃祖乎平道風秀世並自稱其先祖為乃祖不訓作汝也又易萃卦初六有孚不終乃亂乃萃此言不終其孚則自亂其所萃上乃字繼事之辭下乃字猶云其也又漢書賈誼傳古之王者太子廼生師古云廼始也又後漢書班固傳伊考自邃古乃降注云言自遠古以來又周

禮小司寇正歲帥其屬而觀刑象令以木鐸曰不用法者國有常刑令羣士乃宣布於四方憲刑禁乃命其屬入會乃致事疏云謂命已下屬官使入會計文狀來乃致事於王故云乃乃緩辭禮記雜記公視大歛公升商祝鋪席乃歛陳氏集說云乃始鋪席為歛事愚按此乃字猶云然後亦繼事之辭也又莊子逍遙游而後乃今培風而後乃今將圖南韓非說難大中無所拂辭悟言無所繫排乃後申其辨知焉此所以親近不疑漢書叙傳賢闇

彪曰往者周亡戰國並爭天下紛裂數世然後乃

定吳志張紘傳自古帝王受命之君雖有皇靈佐於上文德布於下亦賴武功以昭其勲然而貴於時動乃後為威耳而後乃然後乃乃後並重言也又莊子大宗師孟孫氏特覺人哭亦哭是自其所以乃且也注云乃如此也愚按自從也言孟孫以為人哭而亦哭是從乎世情所不得不然聊且與之哭也舊讀乃字句絕而以且也屬下句恐非又德充符子無乃稱此乃字亦合訓如此言無為如此稱說也又史記東越傳且秦舉咸陽而棄之何乃越也何乃猶云何但又公羊春秋宣公八年已

丑葬我小君頃熊雨不克葬庚寅日中而克葬傳云而者何難也乃者何難也曷為或言而或言乃乃難乎而也按乃非難辭以其有然後之義故云難於而也凡事先已不如此而後始如此者乃云然後故可訓為難也又史記大宛傳蓋乃北海云昭明太子文選序蓋乃事美一時語流千載魏志東夷傳注此蓋乃昔所謂西戎在於街冀源道者也蓋乃發語辭也又庚子山枯樹賦若乃山河阻絕飄零離別若乃更端語也又後漢書朱穆傳至乃田竇衛霍之游客廉頗翟公之門賓進由執合退由哀異至乃猶云至于

矧

爾雅云况也注云譬况詩大雅矧可射思

忍

說文云能也徐氏云能音耐杜子美詩可忍醒

時兩打稀可忍猶俗云爭耐也又杜詩忍使驂騑氣凋喪此忍字猶云不忍省文也

盡

皆也悉也左傳昭公元年周禮盡在魯矣定公

八年虎曰盡客氣也又漢書諸侯王表自鴻門以東盡遼陽為燕代律歷志詔與丞相御史大將軍右將軍史各一人雜侯上林清臺課諸歷疏密凡十一家以元鳳三年十一月朔旦冬至盡五年十

二月各有第此盡字猶云訖也又廣韵云即忍切  
 按曲禮虛坐盡後食坐盡前此盡字當讀如即忍  
 切今作儘也儘前儘後者言極至於前極至於後  
 不容餘地今俗云儘讓是也又增韵云縱令也柳  
 永卜算子詞儘無言誰會高意周密探春詞儘教  
 寬盡春衫此儘字猶任也今云任其如何曰儘如  
 何也

準 猶定也劉德仁詩曾緣玉貌君王寵準擬人看  
 似舊時

允 廣韵云信也愚按信也誠也審也左傳僖公二  
 十八年軍志曰允當則歸史記司馬相如傳允哉  
 漢德後漢書文苑傳允所謂遭仁遇神真所宜傳  
 而著之

近 廣韵云幾也愚按將及之辭也後漢書方術傳  
 適見其鑄此而已近五百歲矣世說王大為吏部  
 郎嘗作選草臨當奏王僧彌來聊出示之僧彌得  
 便以己意改易所選者近半又詩大雅往近王舅  
 南土是保說文云按古文讀近為既朱傳云近語  
 辭也愚按朱說為長往近王舅猶言汝往哉王舅  
 也又公羊傳撥亂世反諸正莫近於春秋何休云

助字辨略 卷三  
莫近猶莫過之也又魏志華佗傳後太祖親理得病篤重使佗專視佗曰此近難濟恒事攻治可延歲月蜀志宗預傳注臣松之以為芝以年啁預是不自顧然預之此答觸人所忌載之紀牒近為煩文晉書謝萬傳王羲之與桓溫牋曰謝萬才流經通處廊廟叅諷議故是後來一器而今屈其邁往之氣以撫順荒餘近是違才易務矣此近字猶殆也近得為幾故亦得為殆也

反 廣韵云不順也史記封禪書及到三神山反居水下漢書賈誼傳足反居上又漢書董仲舒傳春

秋深探其本而反自貴者始此反字猶云還也

宛 廣韵云宛然也愚按宛然者如辭也詩國風宛在水中央言宛然如在也又如國風宛其死矣此宛字亦是如辭然是假如之義與宛如不同朱傳訓為坐見恐非

本 原始之辭也史記齊悼惠王世家灌嬰在滎陽聞魏勃本教齊王反留侯世家竟不易太子者留侯本招此四人之力也

亶 廣韵云信也詩小雅亶其然乎言信然乎又通作但漢書賈誼傳非亶倒縣而已揚雄傳亶費精

神於此

誕 詩大雅誕彌厥月又云誕寘之隘巷朱傳並云

誕發語辭

但 漢書食貨志民欲祭祀喪紀而無用者錢府以

所入工商之貢但賒之師古云但空也徒也言但

賒與之不取息也淮陽王傳縱不伏誅必蒙遷削

貶黜之罪未有但已者也師古云但徒也愚按但

已者言徒然如此而已不復有所短長也又漢書

蕭望之傳後上召堪更生曰繫獄上大驚曰非但

廷尉問邪此但字猶僅也又魏志鍾會傳但可勅

會取艾不足自往但可猶云只須李太白詩但使

主人能醉客不知何處是他鄉此但字與上義頗

相近言只要得主人肯醉客耳又何恤他鄉邪又

李陵答蘇武書但聞悲風蕭條之聲此但字猶云

唯獨也魏志劉廙傳非但君當知臣臣亦當知君

非但猶云非唯非獨又魏志太祖紀注初不中風

但失愛於叔父故見罔耳吳質傳公幹有逸氣但

未道耳此但字是轉語猶云第也特也又王右軍

帖但言此心已馳於彼矣此但字猶云凡也今云

但凡如何也

斷 決辭易繫辭介如石焉寧用終日斷可識矣李  
義山詩斷無消息石榴紅

覲 詩大雅覲天之妹毛傳云覲磬也孔疏云磬作  
是天之妹又云此覲字韓詩文作磬則覲磬義同  
也說文云覲喻也詩云覲天之妹謂之譬喻即引  
此詩箋云尊之如天之有女弟與譬喻之言合蓋  
如今俗語譬喻物云磬作然也愚按覲非譬喻當  
是宛如之義故以譬喻釋之也覲五兩也又謂之  
統所以相風者也恐是統宛音近遂以覲作統而  
以統通宛也

鮮 爾雅云希寡鮮罕也郭注云罕亦希也廣韵云  
少也論語巧言令色鮮矣仁左傳僖公二十年以  
欲從人則可以人從欲鮮濟又詩大雅鮮不為則  
鮮不少有不也又與𡵓𡵓同魏志明帝紀注夫君  
有天下而不得萬姓之歡心者𡵓不危殆

展 廣韵云審也愚按審也信也允也誠也詩國風  
展我甥兮

蹇 離騷蹇吾法夫前修兮王逸云蹇辭也愚按發  
語辭也

轉 猶滯也王右軍帖但恐前路轉欲逼耳宋書王

景文傳吾踰忝轉深足以致謗水經注劉靖碑云  
詔書以民食轉廣陸費不贍轉得為滯者言其展  
轉非向境也

小 少也略也世說上意欲令小加弘潤又云日小

欲晚

少 略也漢書賈誼傳此人少壯豈能忘其父哉少  
壯猶言稍長又云願陛下少留計言少少留意也  
又孟子少則洋洋焉莊子少焉徐無鬼曰嘗語君  
少則少焉猶云少頃也

了 絕也殊也世說庾子嵩讀莊子開卷一尺許便

放去曰了不異人意又歐陽永叔青玉案詞一年  
春事都來幾早過了三之二過了猶云過卻方言  
助語也

好 猶善也珍重付屬之辭世說汝若為選官當好  
料理此人李義山詩好為麻姑到東海勸栽黃竹  
莫栽桑

可 否之反也中庸天下國家可均也爵祿可辭也  
白及可蹈也中庸不可能也又云夫婦之愚可以  
與知焉夫婦之不肖可以能行焉可即可以以為  
語助也又大學有國者不可以不慎不可不勉辭

也又左傳隱公三年光昭先君之令德可不務乎可不猶云豈可不省文也又廣韻云許可也愚按許可之可有兩義如孟子事親若曾子者可也此深許之辭論語暮月而已可也此僅可之辭又范曄後漢書自叙班氏最有高名既任情無例唯志可推耳博瞻可不及之整理未必愧也又云欲徧作諸志前漢可有者悉令備可不及之猶云當不及之可有猶云當有漢書如禮儀輿服等志皆缺此皆史所宜備故云前漢可有者也蔡邕陳政事七要先帝舊典未嘗有此皆可斷絕以覈真偽魏志鍾會傳但可勅會取艾不足自往邠原傳注軍中士大夫詣原者數百人太祖怪而問之時荀文若在坐對曰獨可省問邠原耳諸可字皆當辭也當有應合之義亦否之反也又史記高帝紀遇剛武侯奪其軍可四千餘人漢書天文志五殘星其狀類辰去地可六丈此可字約計之辭也又書堯典試可乃已史記作試不可用而已可云不可者省文也如五子之歌雖悔可追言雖悔不可追亦省文也又李義山詩可要昭陵石馬來又云此情可待成追憶又云可在青鸚鵡方雄飛詩棲身可

在深此可字何辭也可要猶云何用可在猶云何必又黃機酹江月詞黃昏可更子規聲碎烟塢賀鑄清平樂詞楚城滿目春華可堪游子思家此可字猶云那也可得為何故亦得為那也又盧祖舉賀新涼詞可是功名從來誤可是疑辭也又通作哿詩小雅哿矣富人

果 信也審也史記商本纘是時說是胥靡築於傅險見於武丁武丁曰是也得而與之語果聖人漢書趙后傳宮讀書已曰果也世說有識者果不異人意韓退之樊宗師墓誌嘗與觀樂曰後當然已而果然又孟子君是以不果來也趙注云果能也按廣韻云果定也與此義協凡言與事應曰果既許其來而不來是不能遽定其來故云不果仍是信審之辭非不能之謂也又晉語果喪其田注云果猶竟也愚按果是竟事之辭故得為竟也

坐 漢書景帝紀它物若買故賤賣故貴皆坐藏為盜按漢法入罪曰坐言罪與律應不得移動也賈誼傳古者大臣有坐不廉而癢者此坐字與上義少別猶今云緣某事落職也又漢書李陵傳坐預詔之得令老將生姦詐後漢書光武紀邑曰吾昔

以虎牙將軍圍翟義坐不生得以見責讓漢詩但坐觀羅敷此坐字猶云因也又蔡邕幽冀刺史久闕疏以陛下威靈申明禁令在任之人豈不戒懼而當坐設三五自生留闕邪此坐字猶云定也坐是不動之義故得為定也又韋應物詩無將一會易歲月坐推遷坐猶云坐見可待之辭言歲月推遷將坐而見之也

叵 廣韵云不可也後漢書呂布傳布目備曰大耳兒最叵信叵云不可者語之急兩字連作一聲也又後漢書隗囂傳帝知其終不為用叵欲討之班超傳超欲因此叵平諸國注並云叵遂也又謝靈運詩懷故叵新歡此叵字猶云無也因不可之義轉相通借耳

頗 略也少也史記三代世表自殷以前諸侯不可得而譜周以來乃頗可著叔孫通傳臣願頗采古禮與秦儀雜就之漢書高帝紀頗取山南太原之地益屬代師古云少割以益之不盡取也又漢書王莽傳今阮會已度府帑雖未能充略頗稍給略即頗也頗即稍也以此三字為重言者也又史記漢興以來諸侯年表漢獨有三河東郡潁川南陽

自江陵以西至蜀北自雲中至隴西與內史十五  
郡而公主列侯頗食邑其中師古漢書注云十五  
郡中又徃徃有公主列侯之邑也愚按公主列侯  
食邑不盡在十五郡中乃時有之故云頗也漢書  
車千秋傳至今餘巫頗脫柔止師古云言徃徃尚  
為蠱也愚按脫或辭頗脫不止者言時或有為之  
者不休止也此二條亦是稍略之辭而義有不同  
又史記三代世表孔子因史文次春秋紀元年正  
時日月蓋其詳哉至於序尚書則略無年月或頗  
有然多闕此與上諸頗字亦相近或頗有者猶云

間或有之也又漢書陳湯傳騎引卻頗遣吏士射  
城門騎步兵此頗字猶云遂也後漢書隗囂班超  
傳並訓叵為遂叵頗同音則頗亦得為遂也又漢  
書田竇傳於是上使御史簿責嬰所言灌夫頗不  
讐劾繫都司空此頗字猶云皆也頗不讐者言嬰  
為夫白寃皆不實也若略不實不因遂囚繫嬰矣  
如趙充國傳將軍獨不計虜聞兵頗罷且丁壯相  
聚攻擾田者及道上屯兵復殺略人民將何以止  
之李廣傳李蔡之丞相坐詔賜冢地陽陵當得二  
十畝蔡盜取三頃頗賣得四十餘萬此頗字並是

盡悉之辭頗本訓略而略又有盡悉之義故轉相通也盡悉則是遂事之辭故頗叵又得為遂也又漢書賈誼傳割地定制合齊趙楚各為若干國使悼惠王幽王元王之子孫畢以次各受祖之分地地盡而止及燕梁它國皆然其分地衆而子孫少者建以為國空而置之須其子孫生者舉使君之諸侯之地其削頗入漢者為徙其侯國及封其子孫也所以數償之一寸之地一人之衆天子無所利焉誠以定治而已師古云徙其侯國列侯國邑在諸侯王封內而犬牙相入者則正其疆界令其隔絕也封其子孫者分諸侯王之國邑各自封其子孫而受封之人若有罪黜其地皆入於漢故云頗也愚按其削頗入漢之頗乃既已之辭不得訓為皆也此緣上文各受祖之分地而言言諸王之

地見在而未削入漢者令其子孫分受之其分地衆而子孫少者則建而空置之以待更生之子孫受之其業已見削入漢漢又已徙它侯國及封它子孫於其地矣不可奪見在所封者還之乃別以它地如其祖所封之數而償之此二條者割地定制之大端故云一寸之地一人之衆天子無所利

也如師古云乃復舉上文耳且有罪黜仍削入之  
安見寸地一人非所利邪恐不然矣又後漢書五  
行志引風俗通云龍從兄陽求臘錢龍假取繁數  
頗厭患之又云丞相邴吉以為道路死傷既往之  
事京兆長安職所窮逐而住車問牛喘吐舌者豈  
輕人而貴畜哉頗念陰陽不和必有所害此頗字  
猶云甚也

**夥** 史記注云楚謂多為夥說文云齊謂多為夥愚  
按夥驚歎聲也義詳一卷頤字條下

**舍** 論語君子疾夫舍曰欲之而必為之辭舍曰猶  
云不曰舍是不取之義故可通為不也又孟子且  
許子何不為陶冶舍皆取諸其宮中而用之趙注  
云舍止也愚按止猶只也舍是止息之義借作止  
辭也此舍字當讀作去聲

者 說文云別事辭也正字通云凡文有者字所以  
為分別隔異也愚按如中庸仁者人也義者宜也  
是也又增韻云即物之辭愚按如論語事其大夫  
之賢者友其士之仁者是也又論語君曰告夫三  
子者左傳隱公五年公將如棠觀魚者此者字語  
已辭也又唐人疏狀凡引勅旨訖則以者字足之

如韓退之論變鹽法事宜狀右奉勅將變鹽法事  
貴精詳宜令臣等各陳利害可否聞奏者陸宣公  
收河中後請罷兵狀昨日欽淑奉宣聖旨示臣馬  
燧渾瑊等奏平懷光收河東狀兼令臣商量須作  
何處置令欽淑奏來者此者字亦語已之辭當時  
體例如此也宋人亦多用此式又公羊傳宣公二  
年勇士入其大門則無人門焉者入其閨則無人  
閨焉者焉者亦語已辭也又論語安見方六七十  
如五六十而非邦也者禮記檀弓魯人有周豐也  
者也者語已辭又論語孝弟也者此是語之頓挫  
與上也者義別又公羊傳隱公二年然則為取可  
以為其有乎曰否何者若楚王之妻媢無時焉可  
也何休云何者將設事類之辭又蜀主王衍醉妝  
詞者邊走那邊走者邊猶云此邊也毛晃云凡稱  
此箇為者箇俗多改用這字這乃迎也愚按這音  
彥今借作者讀作者去聲常毅才調集載無名氏  
詩云三十六峯猶未見况伊如燕這身材唐人用  
這字始此

也 廣韻云語助辭之終也愚按詩國風何其處也  
必有以也此也字在句末辭之終也其後也悔其

嘯也歌此也字在句中但為助句而已又論語回也賜也此語助用之稱謂者也又論語赤之適齊也吾聞之也此也字語之頓挫與語已辭別又孟子我非愛其財而易之以羊也宜乎百姓之謂我愛也我非愛其財句絕而易之以羊也猶云而易之以羊矣言我非愛財而後以小易大然既已以小易大矣宜乎百姓之謂我愛財也論語其為仁矣猶云其為仁也矣得為也則也亦得為矣並辭之頓挫者也又孟子未有仁而遺其親者也未有義而後其君者也語輕但為也語重則為者也亦語已辭也又韓非說難所說出於為名高者也而說之以厚利則見下節而遇卑賤必棄遠矣所說出於厚利者也而說之以名高則見無心而遠事情必不收矣此者乃辭之頓挫與上者也義別又杜子美詩青袍也自公此也字猶亦也

雅 史記高帝紀雍齒雅不欲屬沛公服虔云雅故也蘇林云雅素也又漢書燕王劉澤傳今呂氏雅故本推轂高帝就天下按雅是推原平素之辭故服訓故也既云雅又云故重言也又世說劉尹先推謝鎮西謝後雅重劉此雅字猶云極也

假 廣韵云且也借也愚按假是設辭且復譬况故云且也借也荀子性惡篇假之有兄弟資財而分者水經注俗說以唐城為望都城者自北無城以擬之假復有之途程紆遠山河之狀全乖古證又莊子大宗師浸假而化予之左臂以為鷄予因以求時夜浸假而化予之右臂以為彈予因以求鴉炙浸假而化予之尻以為輪以神為馬予因而乘之豈更駕哉郭象云浸漸也愚按浸假而化者言假如漸化倒文也此假字亦是設辭郭云漸者止以訛浸非訛假也今遂以浸假為漸者非又莊子德充符奚假魯國丘將引天下而與從之郭注訓奚假為何但愚按但第也第且也假既為且故亦得為但也又荀子非十二子篇假今之世飾邪說文姦言以梟亂天下欺惑愚衆喬宇嵬瑣使天下混然不知是非治亂之所存者有人矣此假字猶云如也若也如若有假設之義故轉相通也又詩周頌假以益我我其收之朱傳云假何之轉也愚按詩遐假通何遐通故假得轉為何也

且 孟子且以文王之德且以猶云夫以賈誼過秦論且夫天下非小弱也二且字發語辭也又論語

且爾言過矣又云且爾與其從辟人之士也豈若從辟世之士乎哉戰國策宣王曰嗟乎君子焉可侮哉寡人自取病耳及今聞君子之言乃今聞細人之行願請受為弟子且顏先生與寡人游食必太牢出必乘車妻子衣服都麗諸且字是轉語猶云抑也又詩國風且以喜樂且以永日史記秦本紀臣誠私利祿爵且留再用其言得脫一不用及虞君難漢書馮奉世傳承相御史兩將軍皆以為民方收歛時未可多發萬人屯守之且足後漢書馮魴傳褒等聞帝至皆自髡剔負鉄鑽將其衆請罪帝且赦之諸且字並是聊且姑且之辭又孟子人且惡之又云然且至又云管仲且猶不可名後漢書孔融傳雖無老成人且有典型諸且字猶云尚也且猶即猶尚重言也又史記秦本紀賓客羣臣有能出奇計彊秦者吾且尊官與之分土項羽本紀范增謂項莊曰若入前為壽請以劍舞擊沛公於坐殺之不者若屬皆且為所虜漢書杜欽傳欽子及昆弟支屬至二千石者且十人諸且字猶云將也又戰國策秦伐魏取安邑伐趙取晉陽伐楚取鄢郢矣覆三國之軍兼二周之地舉韓氏取

且爾言過矣又云且爾與其從辟人之士也豈若從辟世之士乎哉戰國策宣王曰嗟乎君子焉可侮哉寡人自取病耳及今聞君子之言乃今聞細人之行願請受為弟子且顏先生與寡人游食必太牢出必乘車妻子衣服都麗諸且字是轉語猶云抑也又詩國風且以喜樂且以永日史記秦本紀臣誠私利祿爵且留再用其言得脫一不用及虞君難漢書馮奉世傳承相御史兩將軍皆以為民方收歛時未可多發萬人屯守之且足後漢書馮魴傳褒等聞帝至皆自髡剔負鉄鑽將其衆請罪帝且赦之諸且字並是聊且姑且之辭又孟子人且惡之又云然且至又云管仲且猶不可名後漢書孔融傳雖無老成人且有典型諸且字猶云尚也且猶即猶尚重言也又史記秦本紀賓客羣臣有能出奇計彊秦者吾且尊官與之分土項羽本紀范增謂項莊曰若入前為壽請以劍舞擊沛公於坐殺之不者若屬皆且為所虜漢書杜欽傳欽子及昆弟支屬至二千石者且十人諸且字猶云將也又戰國策秦伐魏取安邑伐趙取晉陽伐楚取鄢郢矣覆三國之軍兼二周之地舉韓氏取

其地且天下之半注云且猶幾也愚按猶幾將也  
又莊子方且本身而異形方且尊知而大馳陸德  
明音義云凡言方且者言方將有所為也又荀子  
性惡篇假之有兄弟資財而分者且順情性好利  
而欲得若是則兄弟相拂奪矣且化禮義之文理  
若是則讓乎國人矣楊注云且發辭也愚按此二  
且字亦是將辭乃語之助不為義者也語助在句  
首故楊云發辭也周語叔父實應且憎以非余一  
人莊子齊物論夫隨其成心而師之誰獨且無師  
乎此二且字語助在句中者亦將辭也又後漢書

文苑傳且公且侯子子孫孫且公且侯猶云乃公  
乃侯亦發語辭也又詩周頌匪且有且匪今斯今  
振古如斯毛傳云且此也鄭箋云饗燕祭祀心非  
云且而有且謂將有嘉慶禎祥先來見也心非云  
今而有此今謂嘉慶之事不問而至也言修德行  
禮莫不獲報乃古古而如此所由來久非適今時  
孔疏云有天下者主於敬待神人接之以禮則人  
神慶悅至誠感物祥瑞必臻故知非且有且非今  
斯今謂嘉慶禎祥之事非謂其有而已有之以言  
報應之疾也且實語助但今謂今時則且亦今時

其實是一作者美其事而丁寧重言之耳又戰國策段干綸曰臣之求利且不利者非此也注云且猶與也又詩國風終風且曷此且字猶云又也又漢書郊祀志黃帝且戰且學仙鼉錯傳險道傾反且馳且射李陵傳且戰且引南水經注且田且漕此且字兩務之辭言方且如此又復如彼也又公羊傳隱公元年且如桓立則恐諸大夫之不能相幼君也注云且如假設之辭愚按假得為且故且亦得為假也

往

漢書高帝紀見諸將往往耦語往往常也

罔 爾雅云靡罔無也疏云無不有也詩云靡神不舉書曰罔有攸赦皆是又書大禹謨罔違道以干百姓之譽此罔字禁止之辭猶云無也

儻

疑辭也史記伯夷傳儻所謂天道是邪非邪正義云不敢的言是非故云儻也陳書後主紀夫體

國經野長世字氓雖因草儻殊弛張或異至於旁求俊又爰逮側微用道和羹是隆大厦此儻字猶云或也今云儻或重言也又省作黨漢書董仲舒傳試迹之古返之於天黨可得見乎師古云黨他朗反

黨 荀子天論篇怪星之黨見楊注云黨見頻見也  
又公羊傳文公十三年往黨衛侯會公於沓至得  
與晉侯盟反黨鄭伯會公於斐何休云黨所也所  
猶是齊人語也愚按五百家為黨黨是居處之所  
故借為語助之所往所反所猶云往時反時時是  
古通故何云猶是也

枉 徒也空也李義山詩枉緣書札損文鱗

妄 猶云無何無端非意所及故云妄也漢書車干  
秋傳漢置丞相非用賢也妄一男子上書即得之  
矣金日磾傳陛下妄得一胡兒即貴重之

併 廣韻云皆也庚子山春賦河陽一縣併是花併  
是花猶云都是花也又漢書賈誼傳高皇帝與諸  
公併起師古云併聲雜也愚按併起者一齊俱起  
故師古云殺雜也

請 以卑承尊有所啟請故云請也論語請問其目  
又云回雖不敏請事斯語矣

鼎 漢書賈誼傳天子春秋鼎盛應劭云鼎方也賈  
捐之傳顯鼎貴上信用之如淳云方言且欲貴也  
又匡衡傳無說詩匡鼎來服虔云鼎猶言當也若  
言匡且來也應劭云鼎方也張晏云衡少時字鼎

長乃易字雅圭世所傳衡與貢禹書上言衡敬報下言匡鼎白知是字也師古云服應二說是

頃 猶云間也俄頃少間也史記循吏傳市令告相曰市亂相曰如此幾何頃乎市令曰三月頃幾何頃猶云幾何間也又漢書楊惲傳頃者足下離舊土臨安宅世說自頃世故睽離心事淪蕩此頃字猶云近來也頃不訓近因少頃俄頃之義省而通耳如韓湘詩能開俄頃花竟以頃為即辭矣

竝 一作並爾雅云併也廣韻云比也漢書高帝紀諸侯竝起蘇武傳少以父任兄弟竝為郎竝者同時相比之辭也又後漢書方術傳見者呼之曰薊先生小住竝行應之注云竝猶且也

整 凡數無奇零曰整蜀志諸葛武侯傳亮以建興五年抗表北伐自傾覆至此整二十年

等 廣韻云齊也史記陳涉世家等死耳等死猶云同一死也又廣韻云輩也漢書文帝紀單于無言章尼等非章尼一人故云等以括之又廣韻云類也漢書趙后傳丞相是何等兒也何等猶俗云那樣又漢書宣許后傳衍曰夫人言何等不可者何等不可猶云無所不可也又後漢書文苑傳衡更

熟視曰死公云等道注云等道猶今言何物語也  
應璩云用等稱才學往往見歎譽此等字竝是何  
辭也又元微之詩總被天公霑雨露等頭成長盡  
生涯等頭猶云一舫又孟東野詩文魄既飛越官  
情唯等閒李義山詩莫等韓憑為蛺蝶等閒飛上  
別枝花皮襲美詩等閒遇事成歌詠取次衝筵隱  
姓名等閒猶云尋常輕易之辭也

肯 爾雅云可也愚按肯願辭也心誠願之故為可  
也左傳成公四年楚雖大非吾族也其肯字我乎  
漢書高帝紀燕王韓廣不肯徙遼東又杜子美詩  
甘從投轄飲肯作置書郵肯猶云不肯省文也

有 易繫辭聖人有以見天下之蹟聖人有以見天  
下之動漢書賈誼傳臣有以知陛下之不能也有  
者對無之辭確知見其如此故云有以也又論語  
唐虞之際正義云舜之為虞猶禹之為夏外傳稱  
禹氏曰有夏則如舜氏曰有虞顓頊已來地為國  
號而舜有天下號曰有虞氏愚按此言撫有天下  
故云有也春秋隱公三年春王二月己巳日有食  
之亦云有者凡日月合朔日乃食然亦有合朔而  
不食者有食有不食故云日有食之也又隱公十

一年正義云十盈而更始以奇從盈數故云有也  
愚按以奇從盈數者十是盈數一是奇零之數十  
有一年猶云十零一年也或云有又也然則十又  
一年亦是以奇從盈之辭也如論語必有寢衣長  
一身有半史記孔子世家於是肅慎貢楛矢石砮  
長尺有咫諸有字其義並同又詩國風終風且曠  
不日有曠朱傳云有又也言不旋日而又曠也儀  
禮士相見禮主人對曰某子命某見吾子有辱鄭  
注云有又也疏云鄭轉有為又者以言某子以命  
命某往就彼見吾子又自辱來於義為便故從又  
不從有也荀子性惡篇以人之性固正理平治邪  
則又惡用聖王惡用禮義矣哉楊注云有讀為又  
又後漢書二王仲長統傳論或推前王之風可行  
於當年有引救敝之規宜流於長世此有字猶云  
或也詳五卷或字條下又左傳僖公十年不有廢  
也君何以興僖公二十八年不有居者誰守杜稷  
不有行者誰扞牧圉文公十二年不有君子其能  
國乎不有猶云若無又僖公二十八年魏犢束胸  
見使者曰以君之靈不有寧也此不有猶云不敢  
又論語不有博奕者乎此不有猶云豈無又易繫

辭无有遠近幽深遂知來物无有猶云不論又大  
學未有上好仁而下不好義者也孟子然而不王  
者未之有也未有者決辭言斷然必無之也又戰  
國策臣願請藥賜死而恩以相葬臣王不失臣之  
罪而無過舉之名王曰有之遂弗殺而善遇之注  
云有之蓋然其過舉之言

否 廣韵云不也書堯典岳曰否德忝帝位否德猶  
云不德無德也左傳僖公二十三年赴以名則亦  
書之不然則否此言不赴以名則不書之也又大  
學其本亂而未治者否矣此否字不然之辭也又  
不然之辭有二如孟子曰否此決辭也如漢書成  
帝紀儒林之官四海淵源宜皆明於今古温故知  
新通達國體故謂之博士否則學者無術焉此否  
字兩設之辭言不如此則學者無所傳述也

偶 增韵云適然也後漢書儒林傳詔問昆曰前在  
江陵反風滅火後守弘農虎北渡河行何德政而  
致是事昆對曰偶然耳太上隱者詩偶來松樹下  
高枕石頭眠凡云偶者非常然故得為適也

後 然後而後乃後竝繼事之辭也又通作后大學  
物格而后知至

苟 論語苟志於仁矣無惡也朱注云苟誠也其心誠在於仁則必無為惡之事矣又孟子苟得其養無物不長此苟字辭之未定猶云果也審也又中庸苟無其德不敢作禮樂焉此苟字猶云如也若也又論語苟美矣朱注云苟聊且粗略之意後漢書馬援傳季孟平生自言所以擁兵衆者欲以保全父母之國而完墳墓也又言苟厚士大夫而已此言聊復為士大夫地無他羸望也義與上同又詩國風人之為言苟亦無信舍旃舍旃苟亦無然鄭箋云苟且也愚按此云姑且也又楊子法言非苟知之此言非但知之也苟且也且第也第但也轉相訓

某 儀禮士冠禮字辭曰禮儀既備令月吉日昭告爾字爰字孔嘉髦士攸宜宜之於假永受保之曰伯某甫疏云伯某甫者若云尼甫嘉甫也但設經不得定言人字故言甫為且字是以禮記諸侯薨復曰臯某甫復鄭云某甫且字以臣不名君且為某之字呼之愚按伯某甫者無所指名之辭凡無所指名及泛言事物與不知姓名皆云某也如儀禮聘禮反命曰以君命聘於某君某君受幣於某

官某君再拜以享某君某君再拜漢書項籍傳某時某喪使公主某事不能辨元許后傳設妾欲作某屏風張於某所柳子厚文永有某氏之類是也某甫復者不敢斥君之名也如尚書惟爾王孫某禮記孝王某之類是也

陡 與斗通猝然也張九齡勅日本書丹墀真人廣成等入朝東歸初出江口雲霧斗暗所向迷方汪莘憶秦娥詞夜來陡覺霜風急

寢 浸寢寤寢竝同廣韵云漸也易遯卦彖傳小利貞浸而長也楊子法言浸以廣大漢書禮樂志質樸日消恩愛寢薄溝洫志海水溢西南出寤數百里又漢書劉向傳政由王氏出災異寢甚此浸字猶云彌也益也廣陵厲王傳寤信女須等師古云寤古浸字漸也益也

審 信也果也黃庭經審能行之可長存史記張耳傳貫高喜曰吾王審出乎

甚 廣韵云劇過也愚按猶極也史記文帝紀今秘祝之官移過於下以彰吾之不德朕甚不取晏平仲傳意氣揚揚甚自得也漢書高帝紀欲省賦甚又姜夔探春慢詞甚日歸來梅花零亂春夜齊天

助字辨 卷三  
樂詞夜涼獨自甚情緒此甚字猶何也又周密一枝春詞東風尚淺甚先有翠嬌紅嫵此甚字猶云如何俗云為甚也

恁 方言此也姜夔疎影詞等恁時重覓幽香已入小窓橫幅又黃機水龍吟詞恨荼蘼吹盡櫻桃過了便只恁成辜負此恁字猶云如此言便只是如此遂過卻春也

敢 書湯誓敢昭告於皇皇后帝禮記投壺賓曰敢固辭主人曰敢固以請儀禮士虞禮敢用絜牲鄭注云敢冒昧之辭疏云凡言敢者皆是以卑觸尊不自明之意又書盤庚予敢動用非罰酒誥矧曰其敢崇飲此敢字猶云豈敢省文也

漸 廣韻云漸次也稍也漢書成帝紀其申勅有司以漸禁之魏志陳羣傳注太丘長陳實實子鴻臚紀紀子司空羣羣子泰四世於漢魏二朝竝有重名而其德漸漸小減

奄 詩大雅奄有四方毛傳云奄大也愚按奄有函蓋之意故云大也又廣韻云忽也遽也世說注愉始至鎮而桓彖楊佺期舉兵以應王恭乘流奄至 憺 爾雅云曾也郭注云發語辭見詩邢疏云憺猶

言曾也曾則也皆發語辭郭云見詩者小雅節南山憯莫懲嗟衛風河廣曾不崇朝之類是也愚按此言節南山之憯莫懲嗟猶河廣之曾不崇朝也大雅民勞式遏寇虐憯不畏明雲漢胡寧瘖我以旱憯不知其故毛傳竝云憯曾也憯得為曾者音相近也

助字辨略卷之三終



